

Татулық пен тұрақтылық белгісі

1 мамыр – ұлттық бірлігіміздің күні. Қазақстандағы барлық халықтардың достығы мен келісім мерекесі. Халық бірлігі – толеранттылық пен мәдениетаралық қатынасқа негізделген қуатты да берекелі мемлекеттің белгісі. Қазақстанда 130-дан астам ұлт өкілдері татутәтті өмір сүріп жатыр. Елімізде қол жеткен табыстардың барлығы татулық пен келісімнің жемісі.

Бұл күні бір шаңырақтың астына топтасқан барлық ұлттық мәдени орталықтар ән айтып, би билеп, салт-дәстүр мен әдет-ғұрыпқа толы түрлі көріністерді көрсетеді. Барлық мекемелерде дерлік концерт, мерекелік іс-шаралар өткізіледі.

1 мамыр мерекесі ТМД-ның көптеген елдерінде тойланады. Мереке

деп атағанымен, атаулары бөлек. Армения, Беларусь және Қырғызстанда – Еңбек күні, Молдова мен Украинада – Еңбекшілердің халықаралық ынтымақтастығы күні, Ресей Федерациясында 1 мамыр – көктем мен еңбек мерекесі, ал, Тәжікстанда еңбекшілердің халықаралық ынтымақтастығы күні ретінде тойланады.

1995 жылы 18 қазанда бұл күн Қазақстан Республикасында ұлтаралық бірлік күні болып бекітілді. 1 мамырды Қазақстан халқының бірлігі күні деп жариялау туралы Қаулыға қол қойылды.

Қазақстан халқының бірлігі күніне, М.Әуезов атындағы Оңтүстік Қазақстан университеті әскери кафедрасының құрылғанына 60 жыл толуына орай Шымкент

қаласындағы жоғары оқу орындары жанындағы әскери кафедралар студенттерінің арасында әскери қолданбалы спорт түрлерінен жарыс өтті.

«Бірлік болмай, тірлік болмас» демекші, студенттер арасындағы жарысымыз ұйымдасқан түрде өтті. Жарыс жүлдегерлері «М.Әуезов атындағы Оңтүстік Қазақстан университеті» коммерциялық емес акционерлік қоғамының басқарма төрағасы – ректоры атындағы кубоктармен марапатталды.

Бауыржан БАЙҒҰЛОВ,
М.Әуезов атындағы ОҚУ-дың
КЕАҚ әскери кафедрасының
оқытушысы,
запастағы майор.